


REXISTRO XERAL DA VALEDORA DO POBO
SANTIAGO DE COMPOSTELA

Data: 01/10/2021 12:13:25

SAIDA **15132/21**



D^a Patricia Pérez Marín e D. Ignacio Louro Ojea
(CONGAPA)
Colexio Tirso de Molina Rúa Arce s/n
15402 Ferrol (A Coruña)

Expediente: D.3.Q/7099/21

Santiago de Compostela, 1 de outubro de 2021

Estimada Sra. Pérez e Sr. Louro:

Como sabe, nesta institución iniciáronse 295 expedientes de queixa como consecuencia dos escritos de representantes legais de alumnos e alumnas de centros privados con unidades concertadas de educación infantil e educación primaria. Cada un dos escritos é presentado polo pai ou nai de alumnado con necesidades específicas de apoio educativo, especificando o diagnóstico do seu fillo ou filla con necesidades educativas especiais (trastornos de espectro autista, trastornos xeralizados do desenvolvemento, trastornos específicos da linguaxe, déficit de atención e hiperactividade...), problemas por incorporación tardía ao sistema educativo español, dificultades específicas de aprendizaxe, altas capacidades intelectuais, ou condicións persoais ou do seu entorno. Tamén se rexistraron escritos de representantes das entidades titulares de centros educativos con unidades concertadas e de representantes de asociacións ou federacións de pais e nais do alumnado.

Iniciamos actuacións como continuación do expedientes tramitados o pasado ano e requirimos informe á administración educativa, tendo en conta ás situacións detalladas nos escritos de queixa por parte dos representantes legais de alumnos e alumnas con necesidades específicas de apoio educativo escolarizados en unidades concertadas, a urxencia da súa detección temperá e a atención adecuada deste alumnado polo persoal de orientación.

En concreto, solicitamos información dos motivos polos que os servizos de orientación en Educación Primaria en centros privados concertados da Comunidade Autónoma de Galicia non forman parte da contía económica dos módulos que os centros concertados reciben da administración en pago delegado, destinados aos salarios e outros conceptos retributivos do persoal docente, unha vez determinada a dotación precisa e a xornada correspondente segundo as unidades concertadas do centro.

En relación coa queixas indicadas, presentadas polos representantes legais do alumnado de diversos centros docentes privados con unidades concertadas de educación primaria e

motivadas pola dotación dos servizos de orientación, a Consellería de Cultura, Educación e Universidade remitiu un informe o 30/06/2021 do que lle demos traslado no seu día.

Como conclusión do sinalado nos informes e por vostedes mesmos, esta institución, en aplicación do disposto no artigo 32.1 da Lei 6/1984, do 5 de xuño, pola que se rexe, formulou á Consellería de Cultura, Educación e Universidade a seguinte suxestión:

Que, tendo en conta as necesidades específicas de apoio educativo do alumnado ao que se refiren os escritos de queixa, e co fin de facer efectivo o mandato de dotar aos centros sostidos con fondos públicos dos recursos necesarios para a orientación educativa, se valore adoptar as medidas precisas para que os servizos de orientación dos centros docentes con unidades concertadas de Educación Primaria, sexan financiados con criterios análogos aos dos centros públicos.

Dando cumprimento á obriga establecida no art. 32.2 da citada Lei, a Consellería de Cultura, Educación e Universidade respondeu á resolución que se lle fixo chegar, e nesa resposta **reitérase o xa manifestado nos diversos informes anteriores desa Consellería sobre a mesma problemática.**

O sistema e réxime de financiamento dos centros concertados é o que se define no artigo 117 da Lei orgánica 2/2006, do 3 de maio, de educación (contía global e distribución por módulo diferenciando os conceptos de salarios, gastos variables e outros gastos), reflectida na Comunidade Autónoma de Galicia a través da correspondente lei anual de orzamentos. Este é, polo tanto, o marco normativo legal de referencia para establecer o seu réxime económico.

En Galicia aprobáronse, a través de diferentes instrumentos, melloras tanto respecto da dotación dos servizos de orientación como de especialistas de audición e linguaxe e de pedagogía terapéutica.

Porén, a Orde do 30 de xullo de 2021 pola que se aproban as bases reguladoras das axudas a centros privados concertados da Comunidade Autónoma de Galicia para atender o alumnado con necesidades específicas de apoio educativo para o curso 2021/22 (código de procedemento ED3011) (DOG núm. 168, do 1 de setembro), incrementou o seu orzamento. Trátase dunha orde de convocatoria anual desta Consellería, que é coñecida polos centros privados con unidades concertadas e cubre un amplo abano de posibilidades para a contratación de especialistas para atender ao alumnado (infantil-primaria-ESO); así, para este curso 2021/2022 produciuse un incremento no seu orzamento en 90.000 € acadando unha dotación total de 450.000 €.

Logo de todo o exposto, a administración educativa reitera que a estrutura e a distribución dos módulos para o sostemento dos departamentos de orientación nos centros privados concertados cumpre a legalidade vixente, tanto estatal como autonómica polo que non se

acepta a suxestión de establecer un sistema de financiamento análogo aos centros públicos para os servizos de orientación en Educación Primaria en centros privados concertados. Porén, a suxestión é parcialmente aceptada ao incrementar a dotación das axudas para centros privados concertados da Comunidade Autónoma de Galicia para atender o alumnado con necesidades específicas de apoio educativo para o curso 2021/22, como forma de facer efectivo o mandato de dotar aos centros sostidos con fondos públicos dos recursos necesarios para a orientación educativa.

Da resposta agora tratada dedúcese que a Consellería de Cultura, Educación e Universidade aceptou en parte a resolución formulada por esta institución.

Por todo o sinalado ata agora, en principio non parece preciso continuar a investigación iniciada como consecuencia do seu escrito de queixa, e conclúese este expediente sen prexuízo de reabrilo a súa instancia pola aportación de novos datos ou circunstancias.

Agradézolles a confianza que nos demostran e reciban un atento saúdo.

María Dolores Fernández Galiño
Valedora do Pobo